

Минерал ўғитлар хавфсизлиги тўғрисидаги умумий техник регламент

1-боб. Қўлланиш мақсади ва соҳаси

1. Минерал ўғитлар хавфсизлиги тўғрисидаги техник регламент (кейинги ўринларда - Техник регламент) Ўзбекистон Республикаси ҳудудида инсонлар ҳаёти ва (ёки) соғлиғи, ҳайвонлар ва ўсимликлар, атроф муҳитни, мулкни ҳимоя қилиш, минерал ўғитларнинг қўлланилиши ва хавфсизлиги хусусида истеъмолчиларни чалғитувчи ҳаракатларнинг олдини олиш мақсадида ишлаб чиқилган.

2. Мазкур Техник регламент Техник регламентга 1-иловага мувофиқ рўйхатда келтирилган, Ўзбекистон Республикаси ҳудудида ишлаб чиқариладиган, олиб кириладиган (импорт қилинадиган) минерал ўғитларга ҳамда минерал ўғитларни сақлаш, ташиш ва тамғалаш жараёнларига нисбатан қўлланилади.

3. Техник регламент талаблари органик ва органик-минерал ўғитларга нисбатан қўлланилмайди.

4. Қуйидаги хавфли омиллар минерал ўғитлар ва уларнинг таркибий қисмларига хос ҳисобланади:

ёнғин ва портлаш хавфи;

оксидловчи хусусиятлар;

коррозия хусусиятлари;

инсон учун хавфлар: перорал, дермал ва ингаляцион токсиклик, тери ва шиллик қатламларга ялиғлантирувчи таъсир, тери-резорбтив таъсир, аллергиялик, инсон организмида биоаккумуляция ва атроф муҳит объектларида (сув, тупроқ, ўсимликлар) тўпланиш хусусиятлари;

радиоактив хавфлилик;

экотизимга таъсир.

2-боб. Атамалар ва таърифлар

5. Техник регламентни қўллаш мақсадида қуйидаги атамалар ва таърифлардан фойдаланилади:

ариза берувчи - ишлаб чиқарувчи, ишлаб чиқарувчининг ваколатли вакили, сотувчи ёки импорт қилувчи;

ваколатли орган - кимёлаштириш ва ўсимликларни ҳимоя қилиш воситаларини синовдан ўтказиш ва рўйхатга олиш бўйича ваколатли давлат органи;

идентификация - мувофиқликни баҳолаш мақсадида тақдим этилган минерал ўғитларнинг тамғасида кўрсатилган муҳим белгиларга айнан мослигини аниқлаш;

импорт қилувчи - норезидент бўлган хорижий ҳамкорлардан олинган минерал ўғитларни Ўзбекистон Республикаси ҳудудида эркин муомалага чиқарувчи ва ушбу ўғитларнинг Техник регламент талабларига мувофиқлиги учун жавобгар ҳисобланган Ўзбекистон Республикаси резиденти бўлган хўжалик юритувчи субъект;

ишлаб чиқарувчи - Ўзбекистон Республикаси ҳудудида ўз номидан минерал ўғитларни ишлаб чиқариш ёки ишлаб чиқариш ва муомалага киритиш билан шуғулланувчи ҳамда ушбу минерал ўғитларнинг Техник регламент талабларига мувофиқлиги учун жавобгар бўлган юридик шахс, жумладан, якка тартибдаги ёки хорижий тадбиркор;

ишлаб чиқарувчининг ваколатли вакили - ишлаб чиқарувчи, шу жумладан, хорижий ишлаб чиқарувчи билан тузилган шартнома асосида мувофиқликни баҳолашда ва минерал ўғитларни Ўзбекистон Республикаси ҳудудида муомалага чиқаришда ушбу ишлаб

чиқарувчи номидан иш юритадиган ҳамда минерал ўғитларнинг уларга нисбатан қўлланиладиган бошқа техник регламент талабларига номувофиқлиги учун жавобгар ҳисобланган ва Ўзбекистон Республикаси ҳудудида белгиланган тартибда рўйхатдан ўтган юридик шахс ёки яқка тартибдаги тадбиркор ҳисобланган жисмоний шахс;

кимёвий хавфсизлик - зарарли кимёвий моддалар миқдорининг (концентрациясининг) ошиб кетиши натижасида фойдаланувчи (истеъмолчи) ҳаётига хавф соладиган ёки соғлиғига зарар етказадиган йўл қўйиб бўлмайдиган хавф-хатар мавжуд бўлмаган маҳсулот ҳолати;

микроэлементли ўғит - таркибида макро ва микроэлементлар бўлган минерал ўғит;

микроўғит - озиқлантирувчи элементлари микроэлементлар ҳисобланган минерал ўғит;

минерал ўғит - таркибида минерал шаклидаги озиқлантирувчи элементлар бўлган, ишлаб чиқариш ёки қазиб олиш йўли билан олинган ўғит;

минерал ўғитларнинг хавфсизлиги - минерал ўғитлар хавфли хусусиятларининг одамга, атроф муҳитга ва мулкка йўл қўйиб бўлмайдиган хавфли таъсири пайдо бўлишини истисно қиладиган огоҳлантирувчи чоралар тизими;

минерал ўғит турлари - таъсир этувчи моддаси бўйича аниқланадиган минерал ўғит тоифалари;

озиқлантирувчи элемент, таъсир этувчи модда - ўсимликларнинг ўсиши ва ривожланиши учун зарур бўлган ўғитнинг кимёвий элементи;

огоҳлантирувчи тамға - ўзида ахборотлар (қисқа матн, алоҳида график ёки рангли белгилар ва уларнинг комбинацияси кўринишидаги) мажмуини ифодалайдиган, қадокқа ёки ёрликка туширилган маълумотларнинг таркибий қисми;

полимер қобик (қатлам, қоплама) - юмшоқ қадокнинг (контейнернинг) қаттик минерал маҳсулотни чанг ва намдан, ифлосланиш ҳамда тўкилишдан (сочилиш, чангиш) химояловчи ички плёнкасимон полимер қатлами;

тамға - маҳсулотни идентификациялаш ва у ҳақидаги маълумотларни истеъмолчига етказиш мақсадида қадокқа ёки ёрликка босиладиган матн, шартли белги ва (ёки) график тасвир кўринишидаги маълумот;

хавфсизлик паспорти - минерал ўғитнинг хавфли хусусиятлари, ишлаб чиқарувчи (ишлаб чиқарувчининг ваколатли вакили), ушбу минерал ўғитнинг импортчиси тўғрисидаги ахборотлар, Ўзбекистон Республикаси ҳудудида минерал ўғитлардан хавфсиз фойдаланиш учун огоҳлантирувчи чоралар ва хавфсизлик талаблари тўғрисидаги ахборотлардан иборат бўлган белгиланган шаклдаги ҳужжат;

юмшоқ контейнер - автомобиль, темир йўл, денгиз ва ҳаво транспортида курук (қаттик) минерал ўғитларни ташиш ва сақлаш учун мўлжалланган полимер қадок («big bag»);

ўғит - ўсимликларни озиқлантирадиган ва тупроқ ҳосилдорлигини оширадиган модда.

3-боб. Минерал ўғитларни идентификациялаш қоидалари

6. Минерал ўғитларни ишлаб чиқарувчи (ишлаб чиқарувчининг ваколатли вакили), импорт қилувчи, давлат назорати органи ҳамда бошқа манфаатдор шахслар томонидан идентификацияланади.

7. Минерал ўғитлар минерал ўғитнинг ташқи кўриниши ва таркиби, озиқлантирувчи элементлари миқдори, жумладан, макро ва микроэлементлар қадогидида ёки ёрлиғида ва кузатув ҳужжатларидаги маълумотларга, минерал ўғит намунасини лаборатория синовларидан ўтказишда олинган маълумотларга мувофиқлигини аниқлаш орқали идентификацияланади.

4-боб. Минерал ўғитларни бозорда муомалага чиқариш қоидалари

8. Минерал ўғитлар Техник регламент талабларига мувофиқ бўлганда ҳамда уларнинг ушбу Техник регламент 10-бобига асосан мувофиқлиги баҳоланганда, Ўзбекистон Республикаси бозорида муомалага чиқарилади.

Бунда Ўзбекистон Республикаси ҳудудига олиб кириладиган (импорт қилинадиган) минерал ўғитларни божхонада расмийлаштиришда декларация билан бирга рўйхатга олинганлик тўғрисида гувоҳнома тақдим этиш талаб этилади (синовлар ва рўйхатдан ўтказиш учун олиб кирилган минерал ўғитлар бундан мустасно).

9. Техник регламент талабларига мувофиқлиги тасдиқланмаган минерал ўғитлар миллий мувофиқлик белгиси билан тамғаланмаслиги лозим.

10. Миллий мувофиқлик белгиси билан тамғаланмаган минерал ўғитларнинг Ўзбекистон Республикаси бозорида муомалага чиқарилишига йўл қўйилмайди.

5-боб. Минерал ўғитларнинг хавфсизлик талаблари

11. Минерал ўғитлар ушбу бобда белгиланган хавфсизлик талаблари ва Техник регламентга 2-иловага мувофиқ радиациявий ва кимёвий хавфсизлик нормаларига жавоб бериши керак.

12. Минерал ўғитлар хавфсизлик паспорти ва огоҳлантирувчи тамғада келтирилган хавфли омиллар бўйича таснифланиши лозим.

13. Савдо тармоқларида (улгуржи ва чакана савдо корхоналари ва ташкилотларида) сотиш учун мўлжалланган минерал ўғитлар қадоқланган бўлиши лозим. Чакана савдода истеъмол қадоғи бузилган минерал ўғитларни сотишга йўл қўйилмайди.

6-боб. Минерал ўғитларни сақлаш жараёнларига қўйиладиган талаблар

14. Минерал ўғитлар муайян ўғит турига берилган хавфсизлик паспортида кўрсатилган сақлаш шароитларига қўйиладиган ўзига хос талабларга мувофиқ сақланади.

15. Қадоқланмаган минерал ўғитларни сақлаш учун махсус ёпиқ бинолар (омборхоналар) ёки сиғимлардан (силослар, омборхоналардан) фойдаланиш лозим.

Қадоқланган (идишга солинган) минерал ўғитларни қаттиқ қопламали очик майдонларда ёки бостирмалар остида сақлашга рухсат этилади.

Атроф муҳит муҳофазаси талабларига амал қилиниши ва ўғитларнинг физик-механик ва кимёвий хусусиятлари сақланиши шарти билан минерал ўғитларнинг суткалик захирасини вақтинча майдончаларда (далада) сақлашга рухсат этилади.

16. Ёнғин-портлаш хавфи мавжуд бўлган ўғитлар (селитра ва улар асосидаги ўғитлар) қадоғи (идиш) борлигидан қатъи назар, алоҳида омборхоналарда ёки омборхонанинг ён томонига жойлаштирилган ва омборхонанинг қолган қисмидан ёнғинга қарши яхлит девор билан ажратилган минерал ўғитлар омборхоналарининг секцияларида сақланади.

Минерал ўғитлар портловчи материаллар омборхоналарида саноат мақсадидаги портловчи материаллар муомаласи соҳасидаги қонунчилик ҳужжатларида белгиланган тартибда сақланади.

17. Минерал ўғитлар омборхоналар ва сиғимларда сақлаш меъёрлари қадоқ (идиш) турига ва сақланадиган ўғитларнинг хусусиятларига қараб, техник жиҳатдан тартибга солиш соҳасидаги норматив ҳужжатлар билан белгиланади.

18. Сақланадиган минерал ўғитлар миқдори омборхоналар ва сиғимларнинг лойиҳада назарда тутилган сиғимидан ошмаслиги керак.

19. Минерал ўғитларни сақлаганда, қуйидаги чора-тадбирлар назарда тутилиши зарур:

уларнинг бутлигини (миқдори ва истеъмолчилик хусусиятларининг ўзгармаслигини) таъминлаш;

инсон организмга зарарли таъсир кўрсатиши мумкин бўлган сақланаётган моддалар билан ходимларнинг алоқасини бартараф этиш ёки уни минимумга етказиш;

хавфли ва зарарли ишлаб чиқариш омилларининг манбаи бўлган чиқиндиларни ўз вақтида утилизация қилиш, атроф муҳитга зарар етказилишига йўл қўймаслик;

ёнгин-портлаш хавфи мавжуд бўлган ўғитларни сақлаганда, ёнгин хавфсизлигининг юқори даражадаги чораларини таъминлаш: двигателларнинг чиқинди газларни чиқариш қувурларида учкун сўндиргичлардан фойдаланиш, очиқ оловдан фойдаланиш имкониятини тақиқлаш ва бартараф қилиш, омборхоналар ва иш жойларини ёнгинни ўчиришнинг бирламчи воситалари ҳамда ёнгинга қарши техник ҳимоя воситалари билан жиҳозлаш.

20. Суюқ ўғитларни сиғимларда (силослар, омборхоналарда) сақлаганда, сиғимлар (герметик тагликлар ёки бошқа воситалар) аварияли емирилган тақдирда, тўкилган маҳсулот ҳажмини чеклашга йўналтирилган тегишли кўшимча техник чоралар ва воситаларни назарда тутиш лозим.

21. Омборхоналарда минерал ўғитлар билан боғлиқ ишлар индивидуал ҳимоя воситаларини қўллаган ҳолда амалга оширилади.

22. Минерал ўғитлар омборхоналаридан озиқ-овқат маҳсулотлари, ем-хашак, хўжалик ва маиший мақсадда қўлланадиган турли буюмлар ва техникани сақлаш учун фойдаланишга йўл қўйилмайди.

23. Шахсий томорқаларда ва кундалик турмушда қўллаш учун харид қилинган минерал ўғитлар ишлаб чиқарувчининг идишида (қадоғида), хайвонлар ва болалар ололмайдиган жойда, озиқ-овқат маҳсулотлари, ичимлик сув ва бошқа халқ истеъмоли товарлари сақланадиган жойлардан изоляцияланган хўжалик қурилмаларида (ёрдамчи хоналарда) сақланиши шарт.

7-боб. Минерал ўғитларни ташиш жараёнларига қўйиладиган талаблар

24. Қаттиқ минерал ўғитлар ёпиқ ва ярим очиқ темир йўл вагонларида, кемаларнинг ёпиқ транспорт сиғимларида (трюм, танкларида) ва автомобиль транспортида мажбурий тарзда борти ёпилган ҳолда ташилади.

Полимер қопламали юмшоқ контейнерларга қадоқланган қаттиқ минерал ўғитларни ярим очиқ вагонларда, кемаларнинг очиқ палубаларида ва автомобиль транспортида бортини ёпмаган ҳолда ташишга рухсат этилади.

Қадоқланмаган қаттиқ минерал ўғитларни фақат саноатда қайта ишлайдиган ва ишлаб чиқариш жараёнида реагент/материал сифатида фойдаланадиган ишлаб чиқариш корхоналарига махсус сочилувчан моддаларни ташишга мўлжалланган вагонлар ва автомобиль транспортида ташишга рухсат этилади.

Полимер қопларга қадоқланган қаттиқ минерал ўғитларни автомобиль транспорти бортини ёпмаган ҳолда ташишга рухсат этилади.

25. Битта вагонда, кемаларнинг ёпиқ транспорт сиғимларида (трюм, танкларида) ва автомобиль транспорти бортида минерал ўғитлар билан бир вақтда бошқа юкларни ташишга йўл қўйилмайди.

26. Хавфли юклар сифатида таснифланувчи, жумладан, ёнгин ва портлаш хусусиятларига эга бўлган минерал ўғитлар Ўзбекистон Республикаси ҳудудида амалда бўлган хавфли юкларни ташиш нормалари ва қоидаларига мувофиқ ташилиши лозим.

27. Суюқ минерал ўғитлар (аммиакли сув, углеаммиакат, суюқ комплекс минерал ўғитлар) хавфсизлик паспортида келтирилган қоидаларга мувофиқ суюқ ҳолда, контейнер ва идишларда темир йўл ва автомобиль транспортида ташилади.

Суюқ минерал ўғитлар суюқ ҳолда сув транспортида муайян минерал ўғит тури учун техник жиҳатдан тартибга солиш соҳасидаги норматив ҳужжатларда келтирилган талабларга мувофиқ ташилади.

Истеъмолчи қадоғига қадоқланган суяқ комплекс минерал ўғитлар транспорт ўрамларида тагликда, контейнерлар ёки идишларда хавфсизлик паспортида келтирилган қоидаларга мувофиқ темир йўл ва автомобиль транспортида ташилади.

28. Суяқ минерал ўғитларни ташиш учун сиғимларни тўлдириш даражаси йўл давомида ҳароратнинг эҳтимолий ўзгариши натижасида маҳсулот ҳажмининг кенгайиши инобатга олинган ҳолда ҳисобланади.

29. Минерал ўғитлар ҳаво транспортида муайян минерал ўғит тури учун техник жиҳатдан тартибга солиш соҳасидаги норматив ҳужжатларда келтирилган талабларга мувофиқ ташилади.

8-боб. Минерал ўғитларни тамғалашга қўйиладиган талаблар

30. Минерал ўғитларнинг тамғаси қуйидаги маълумотлардан иборат бўлиши керак: минерал ўғитнинг номи ва қўлланиш мақсади; озиқлантирувчи элементларнинг номи ва миқдори, жумладан, микро ва макроэлементлар;

ишлаб чиқарувчининг номи (фирма номи) ва жойлашган жойи (юридик шахс учун - юридик шахснинг манзили, амалдаги манзили, жисмоний шахс учун - фамилияси, исми ва отасининг исми (мавжуд бўлса), яшаш манзили, яқка тартибдаги тадбиркор сифатида рўйхатдан ўтган жисмоний шахснинг давлат рўйхатидан ўтганлиги ҳақида маълумот), минерал ўғит ишлаб чиқарилган мамлакат номи;

ишлаб чиқарувчининг товар белгиси (мавжуд бўлса);

минерал ўғитни ишлаб чиқариш ва етказиб бериш учун асос бўлган ҳужжатнинг ифодаланиши;

минерал ўғитнинг маркаси ва (ёки) нави (мавжуд бўлса);

партия рақами (қадоқланган минерал ўғит учун);

минерал ўғитнинг номинал миқдори (оғирлиги ёки ҳажми) (қадоқланган минерал ўғит учун);

минерал ўғитни ташиш, қўллаш ва сақлаш бўйича тавсиялар;

Ўзбекистон Республикасида рўйхатга олинган минерал ўғитнинг рўйхатга олиш рақами;

минерал ўғит ишлаб чиқарилган сана ёки юкланган (ортилган) сана;

қадоқлаш санаси (ой, йил - қадоқланган минерал ўғит учун, агар уларнинг қадоқланиши ушбу минерал ўғитнинг ишлаб чиқарувчиси бўлмаган шахс томонидан амалга оширилган бўлса);

минерал ўғитни сақлаш шартлари;

минерал ўғитнинг қафолатланган сақлаш муддати;

минерал ўғитнинг идентификация штрихли коди (кўндаланг сканерлаш орқали оптик ўқиладиган, ҳар хил қалинлик ва оралиқдаги параллель штрихлар ёрдамида терилган белгиларни ифодаловчи код) - чакана савдо тармоғи орқали сотиладиган минерал ўғитлар учун;

минерал ўғитни қўллаш бўйича чекловлар (ўсимликларни ҳимоя қилиш воситалари билан мослиги, фитотоксиклик);

минерал ўғит билан ишлашда, уни ташиш ва сақлашда эҳтиёт чоралари, шу жумладан, тўкилган ва сочилган минерал ўғитни зарарсизлантириш усуллари;

минерал ўғитнинг идишларини зарарсизлантириш ва утилизация қилиш усуллари;

ўткир заҳарланишнинг клиник кўриниши тавсифи (маълумотлар мавжуд бўлса), тиббий тавсиялар, жумладан, заҳарланишда антидот (мавжуд бўлса) ва биринчи ёрдам чораларини кўрсатган ҳолда.

31. Агар минерал ўғит хавфли минерал ўғит сифатида тавсифланса, минерал ўғитнинг тамғаси шунга мос огоҳлантирувчи тамғани ўз ичига олган бўлиши керак.

32. Қадокланган минерал ўғитларнинг тамгалари уларнинг бутлигини таъминлайдиган бириктириш усулида қадокқа ёки ёрликқа туширилади.

Тамғани тўлиқ ҳажмда тушириш учун қадокда ёки ёрликда жой етарли бўлмаса, маълумотларнинг бир қисми қадокнинг ёки ёрликнинг ҳар бир бирлигига илова қилинадиган ва Техник регламентнинг 30-бандига мувофиқ маълумотлар келтирилган илова-вараққа туширилади ёки тамға қадокнинг иккала томонига туширилади.

33. Қадокланмаган минерал ўғитларни етказиб беришда Техник регламентнинг 30-бандига кўрсатилган маълумотлар (партия рақами, номинал миқдори, қадоклаш санаси ва минерал ўғитнинг идентификация штрихли коди бундан мустасно) кузатув ҳужжатлари тўпламида тақдим этилади.

34. Минерал ўғитларнинг транспорт тамғаси Ўзбекистон Республикаси ҳудудида амалда бўлган хавфли юкларни ташиш нормалари ва қоидаларига мувофиқ бўлиши лозим.

35. Минерал ўғитларнинг тамғасидаги маълумотлар давлат тилида баён этилиши керак. Давлат тилида баён этилган маълумотлар билан айнан бир хил бўлганда, маълумотларнинг бошқа тилларда такрорланишига рухсат берилади.

36. Минерал ўғитларнинг тамғаси аниқ, тушунарли, осон ўқиладиган, ювилиб кетмайдиган, иқлим омилларининг таъсирига чидамли ҳарфлар ёки рамзлар билан туширилган бўлиши ва кўз тушадиган жойга жойлаштирилиши керак.

9-боб. Минерал ўғитларнинг хавфсизлик талабларига мувофиқлигини таъминлаш

37. Минерал ўғитларнинг Техник регламентга мувофиқлиги унинг талабларини бевосита бажариш орқали ёки ихтиёрий равишда қўллаш натижасида Техник регламент талабларига риоя қилишни таъминлайдиган стандартлар рўйхатига киритилган стандартлар талабларини бажариш орқали таъминланади.

38. Минерал ўғитларни синаш ва ўлчаш усуллари Техник регламент талабларини қўллаш ва бажариш ҳамда техник жиҳатдан тартибга солиш объектларининг мувофиқлигини баҳолаш учун зарур синаш, ўлчаш қоидалари ва усуллари, жумладан, намуналарни олиш қоидаларини ўз ичига олган стандартлар рўйхатига киритилган стандартларда белгиланади.

10-боб. Минерал ўғитлар мувофиқлигини баҳолаш (тасдиқлаш)

39. Минерал ўғитларнинг Техник регламент талабларига мувофиқлигини баҳолаш давлат рўйхатга олиш шаклида ва мувофиқликни тасдиқлаш шаклида амалга оширилади.

40. Давлат рўйхатидан ўтказиш учун Ўзбекистон Республикаси қонун ҳужжатларига мувофиқ ўз ҳудудида рўйхатдан ўтган юридик шахс ёки етказиб берилаётган маҳсулотларнинг ушбу техник регламент талабларига мувофиқлигини таъминлайдиган ва етказиб бериладиган маҳсулотларнинг ушбу техник регламент талабларига мос келмаслиги учун жавобгар бўлган ишлаб чиқарувчи, сотувчи ёки импорт қилувчи бўлган якка тартибдаги тадбиркор сифатида жисмоний шахс ариза берувчи бўлиши мумкин.

41. Давлат рўйхатидан ўтказиш Ўзбекистон Республикаси Қишлоқ хўжалиги вазирлиги ҳузуридаги Ўсимликлар карантини ва ҳимояси агентлиги томонидан амалга оширилади.

42. Мувофиқликни баҳолаш (тасдиқлаш) минерал ўғитлар ваколатли орган томонидан Кимёлаштириш ва ўсимликларни ҳимоя қилиш воситаларини синовдан ўтказиш ва рўйхатга олиш тартиби тўғрисидаги низомга асосан синовдан ўтказилиб, рўйхатга олингандан кейин амалга оширилади.

43. Минерал ўғитларни синовдан ўтказиш ва рўйхатга олишда ишлаб чиқарувчилар ёки уларнинг ваколатли вакиллари ёки импорт қилувчилар Ўсимликлар карантини ва ҳимояси агентлигига ариза билан мурожаат қилиши мумкин.

44. Ишлаб чиқарувчи (ишлаб чиқарувчининг ваколатли вакили) ёки сотувчи (импорт қилувчи) аризасига асосан Ўсимликлар карантини ва ҳимояси агентлиги:

тақдим этилган ҳужжатларни ва улардаги маълумотларни кўриб чиқади ва текширади;

минерал ўғитларни синовдан ўтказиши;

минерал ўғитни рўйхатга олиш тўғрисида қарор қабул қилади;

минерал ўғитга индивидуал рўйхатга олиш рақамини беради;

минерал ўғитни Ўзбекистон Республикаси бозорида муомалага чиқариш учун рухсат берилган минерал ўғитларнинг ягона реестрига киритади ҳамда Кимёлаштириш ва ўсимликларни ҳимоя қилиш воситаларини синовдан ўтказиш ва рўйхатга олиш тартиби тўғрисидаги низомга 2-иловага мувофиқ шаклда минерал ўғит рўйхатга олинганлиги тўғрисида гувоҳнома беради.

45. Минерал ўғит рўйхатга олинганлиги тўғрисидаги гувоҳноманинг амал қилиш муддати беш йил.

46. Минерал ўғитлар давлат рўйхатидан ўтказилганлиги тўғрисидаги гувоҳнома олинганидан кейин уларнинг мувофиқлигини тасдиқлаш “Ўзбекистон Республикасида мувофиқлиги тасдиқланиши лозим бўлган мувофиқликни баҳолаш объектлари рўйхатларини тасдиқлаш тўғрисида” ги қарори талабларидан келиб чиққан ҳолда мажбурий сертификатлаш шаклида амалга оширилади.

47. Минерал ўғитларнинг мувофиқлигини баҳолаш (тасдиқлаш) минерал ўғитларни ишлаб чиқарувчи (ишлаб чиқарувчининг ваколатли вакили) ёки импорт қилувчи (сотувчи) бўлган юридик ёки жисмоний шахс сифатидаги якка тартибдаги тадбиркорнинг аризасига кўра амалга оширилади.

48. Минерал ўғитларнинг мувофиқлигини сертификатлаш 1с, 2с ва 3с схемалар бўйича амалга оширилади.

49. Кимёвий маҳсулотларни сертификатлаш қуйидаги сертификатлаштириш схемалари бўйича амалга оширилади:

1С схема – серияли ишлаб чиқариладиган кимёвий маҳсулотларни сертификатлаштиришда қўлланилади. Бунда ариза берувчи ишлаб чиқарувчи (ишлаб чиқарувчининг ваколатли вакили) ҳисобланади ва сертификатланган маҳсулотларни мувофиқлик белгиси билан тамғаланишини таъминлайди;

2С схема – ишлаб чиқарувчида менеджмент тизимларининг сертификати мавжуд бўлган туркум ишлаб чиқарилган маҳсулотлар учун қўлланилади. Бунда ариза берувчи ишлаб чиқарувчи (ишлаб чиқарувчининг ваколатли вакили) ҳисобланади ва сертификатланган маҳсулотларни мувофиқлик белгиси билан тамғаланишини таъминлайди;

3С схема – маҳсулотлар тўпи учун қўлланилади. Бунда ариза берувчи ишлаб чиқарувчи (ишлаб чиқарувчининг ваколатли вакили) ёки сотувчи (импорт қилувчи) ҳисобланади ва сертификатланган маҳсулотларни мувофиқлик белгиси билан (импорт қилинган маҳсулотлар ариза берувчига қулай шаклда) тамғаланишини таъминлайди. Маҳсулотлар Ўзбекистон Республикаси ҳудудига кириб келгунга қадар мазкур схема орқали сертификатлаштирилиши мумкин. Бунда сертификатлаштирилаётган маҳсулотнинг танлаб олинган намуналарига ва уларни сертификатлаштириш органига етказиб беришга ариза берувчи масъул ҳисобланади.

50. Минерал ўғитларнинг мувофиқлигини сертификатлаш схемасини танлаш ариза берувчи томонидан амалга оширилади.

51. Минерал ўғитларнинг мувофиқлигини сертификатлаш қуйидагиларни ўз ичига олади:

а) сертификатлаштириш органларига сертификатлаш юзасидан ариза бериш ва уни кўриб чиқиш;

б) тақдим этилган маҳсулотлар меъёрий ҳужжатларни ва аризага илова қилган бошқа ҳужжатларни таҳлил қилиш;

в) интеллектуал мулк объектларига (товар белгилари, хизмат кўрсатиш белгилари, товар келиб чиққан жой номлари, географик кўрсаткичлар ва саноат намуналари) бўлган ҳуқуқларга риоя этилганлигини ўрганиш ва текшириш;

г) ариза бўйича қарор қабул қилиш;

д) синов дастурини тайёрлаш ва тасдиқлаш;

е) минерал ўғитлар идентификация қилиш;

ж) ўғитлар намуналарини танлаб олиш ва аккредитацияланган синов лабораторияга етказиш;

з) намуналарни аккредитацияланган синов лабораторияларида синовдан ўтказиш;

и) минерал ўғитларни ишлаб чиқариш шароитларини баҳолаш (1С сертификатлаш схемаси учун);

к) сифат тизимини баҳолаш (2С сертификатлаш схемаси учун);

л) олинган натижаларни таҳлил қилиш ва мувофиқлик сертификатини бериш ёки уни беришни рад этиш тўғрисида қарор қабул қилиш;

м) мувофиқлик сертификатларини Давлат реестрида рўйхатдан ўтказиш билан расмийлаштириш ва тақдим этиш;

н) ўғитларнинг белгиланган тартибда ариза берувчи томонидан тамғаланиши.

52. Мувофиқлик сертификатининг амал қилиш муддати:

минерал ўғитлар тўпи учун – уларнинг яроқлилик муддати ёки кафолат муддати;

минерал ўғитларни серияли ишлаб чиқариш учун – 3 йил.

Бунда серияли ишлаб чиқариладиган маҳсулотлар учун расмийлаштирилган мувофиқлик сертификатининг амал қилиш даврида ишлаб чиқарилган маҳсулотлар сертификатланган ҳисобланади ва қайта сертификатлаштирилмайди.

Маҳсулот сертификатлаштирилганлигини тасдиқловчи асос сифатида мувофиқлик белгиси ва маҳсулотга қўшиб юбориладиган ҳамда эксплуатация ҳужжатларидаги ишлаб чиқариш санаси хизмат қилади.

11-боб. Минерал ўғитларни миллий мувофиқлик белгиси билан тамғалаш

53. Техник регламент талабларига мувофиқ ишлаб чиқариладиган ҳамда импорт орқали олиб келинадиган, Техник регламентнинг 10-бобига асосан мувофиқлиги баҳоланган минерал ўғитлар миллий мувофиқлик белгиси билан тамғаланади.

54. Минерал ўғитлар Ўзбекистон Республикаси бозорида муомалага чиқарилишидан олдин миллий мувофиқлик белгиси билан тамғаланади.

55. Миллий мувофиқлик белгиси минерал ўғитнинг ҳар бир қадоғига ёки ёрлиғига (белгини кадоққа тушириш имкони бўлмаганда) туширилади ҳамда минерал ўғит партиясига илова қилинадиган кузатув ҳужжатларида ҳам кўрсатилади.

56. Миллий мувофиқлик белгиси минерал ўғитдан тўлиқ фойдаланиш ёки уни утилизация қилиш пайтигача сақланиб турадиган, аниқ ва тушунарли тасвири таъминлайдиган ҳар қандай усулда туширилади.

12-боб. Давлат назорати

57. Техник регламент талабларига амал қилиш бўйича давлат назорати Ўзбекистон Республикаси Қишлоқ хўжалиги вазирлиги ҳузуридаги Агросаноат мажмуи устидан назорат қилиш инспекцияси, Фавқулодда вазиятлар вазирлиги, Соғлиқни сақлаш вазирлиги, Вазирлар Маҳкамаси ҳузуридаги Саноат, радиация ва ядро ҳавфсизлиги қўмитаси, Экология, атроф-муҳитни муҳофаза қилиш ва иқлим ўзгариши вазирлиги, Ўсимликлар карантини ва ҳимояси агентлиги, Вазирлар Маҳкамаси ҳузуридаги Ўзбекистон техник жиҳатдан тартибга солиш агентлиги, шунингдек, бошқа ваколатли давлат органлари томонидан ўз ваколатлари доирасида амалга оширилади.

58. Техник регламент талабларига амал қилиниши бўйича давлат назорати қонунчилик ҳужжатларида белгиланган тартибда амалга оширилади.

59. Техник регламент талабларига риоя қилиш устидан давлат назоратини амалга оширувчи органларнинг талабларига мувофиқ бўлмаган минерал ўғитларни Ўзбекистон Республикаси бозорида муомалага чиқаришни чегаралаш ва тақиқлаш, шунингдек, уларни муомаладан чиқариш учун қонунчилик ҳужжатларида белгиланган тартибда барча чораларни қўллайди.

13-боб. Яқунловчи қоидалар

60. Техник регламент кучга кирган пайтдан бошлаб, Ўзбекистон Республикаси ҳудудида минерал ўғитлар хавфсизлигига қўйиладиган талабларни белгиладиган амалдаги техник жиҳатдан тартибга солиш соҳасидаги норматив ҳужжатлар Техник регламентга мувофиқлаштирилгунга қадар Техник регламентга зид бўлмаган қисмида қўлланилади.

61. Минерал ўғитга берилган мувофиқлик сертификати Техник регламент кучга киргунга қадар ҳақиқий ҳисобланади.

62. Техник регламент талаблари бузилишида айбдор бўлган шахслар Ўзбекистон Республикаси қонунчилик ҳужжатларида белгиланган тартибда жавоб берадилар.

